

四庫全書

史部

欽定四庫全書

史部

欽定續通典卷八十七

詳校官監察御史臣曹錫寶

洗馬臣王坦修覆勘

校對官中書臣顧宗泰

謄錄監生臣張鴻洲

欽定四庫全書

欽定續通典卷七

食貨

鄉黨版籍

職役附五代

宋

遵

金

元

明

臣等謹按杜典食貨立鄉黨版籍一門而所載徐

偉長中論齊高帝建元之詔皆及職役今考宋以後各史及歷朝會要會典諸書凡鄉黨里保雖代異其制而必兼職役焉故以職役附於鄉黨版籍

以補杜氏之未備云

周世宗顯德五年詔諸道州府令團併鄉村大率以百戶為一團每團選三大戶為耆長凡民家之有奸盜者三大戶察之田民之有耗登者三大戶均之仍每及三載即一如是

宋因前代之制有衙前里正戶長者長太宗太平興國七年令兩京諸州應部民有乏種及耕具人丁者許眾共推擇一人練土地之宜明種植之法者縣補為農師

相視田畝及五種所宜即令鄉三老里胥與農師周勸  
各民於曠土種蒔俟歲熟共取其利為里農師者蠲稅  
免其他役淳化五年令諸縣以第一等戶為里正第二  
等為戶長勿冒名以給役然自承平既久姦偽滋生命  
官形勢占田無限皆得復役衙前將吏得免里正戶長  
應役之戶困於繁數偽為券售田於形勢之家假佃戶  
之名以避徭役仁宗慶厯中委二府大臣裁減科役不  
均以鄉村坊郭戶均差王達為荆南轉運使率民輸錢

免役得緡錢三十萬由是他路競為掊克知并州韓琦  
上疏曰州縣生民所苦無甚於里正衙前每鄉被差疎  
密與貧力高下不均假有一縣甲乙二鄉甲鄉第一等  
戶十五戶計貧為錢三百萬乙鄉第一等五戶計貧為  
錢五十萬番休遞役富者休息有餘貧者敗廢相繼豈  
朝廷為民父母意乎請罷里正衙前命轉運司以州軍  
見役人數為額令佐視五等簿通一縣計之籍皆在第  
一等選貧最高者一戶為鄉戶衙前後差人放此即甲

縣戶少而役繁乙縣戶多而役簡者簿未盡實聽換取  
他戶里正主督租賦請以戶長代之二年一易下其議  
京畿河北河東陝西京東西轉運使度利害皆以為便  
而知制誥韓絳蔡襄極論江南福建里正衙前之弊絳  
請行鄉戶五則之法襄請以產錢多少定役重輕至和  
中命絳襄與三司參定繼遣尚書都官員外郎吳幾復  
趨江東殿中丞蔡稟趨江西與長吏轉運使議可否因  
請行五則法凡差鄉戶衙前視質產多寡置籍分為五

則又第其役輕重放此於是立法下三司頒焉自罷里正衙前民稍休息至神宗熙寧時王安石為相又設保甲之法籍鄉村之民十家為保保丁皆授其弓弩教之戰陣參知政事呂惠卿及其弟曲陽縣尉和卿皆請行手實法其法官為定立田產中價使民各以田畝多少高下隨價自佔仍併屋宅分有無蕃息立等將造簿預具式示民令依式為狀縣受而籍之以其價列定高下分為五等既該見一縣之民物產錢數乃參會通縣役



錢本額而定所當輸明書其數使衆悉知之詔從其請  
於是司農寺乞廢戶長坊正令州縣坊郭擇相鄰戶三  
二十家排比成甲迭為甲頭督輸稅賦苗役一稅一替  
其後諸路皆言甲頭催稅未便遂詔耆戶長壯丁仍舊  
募充其保正甲頭丞帖法並罷哲宗元祐中殿中侍御  
史劉次莊言近制許耆耆戶長須三等已上戶不知三  
等已上戶不願受耆郡縣仍用差法不若立法明差之  
為便繼又定制鄉差役人有應募者可以更代即罷遣

之許借坊場河渡及封樁錢以為雇直耆戶長壯丁召雇不得以保正保長保丁充高宗紹興初叅政李回言於帝曰前詔官戶役錢勿減半民戶役錢概增三分官給庸錢以募戶長及立保甲未幾廢保甲起推割推排之制民間纖微細瑣皆得籍之唯江之東西以畝頭計稅不待推排保正長之立也五家相比五伍為保十大保為都保有保長有都副保正餘及三保亦置長五大保亦置都保正其不及三保五大保者或為之附厯或

為之均并戶則以物力之高下為役次之久近凡差役皆當因時制宜其應免應募毋膠前制云

遼聖宗統和三年樞密奏契丹諸役戶多困乏請以富戶代之上因閱諸部籍有二部戶少而役重者併量減之興宗重熙八年北院樞密使蕭孝穆請籍天下戶口以均徭役由是通括戶口政賦稍平云

金制以民戶內有物力者為課役戶無者為不課役戶令民以五家為保太宗天會三年禁內外官及宗室毋

得私役百姓權勢家不得買貧民為奴世宗大定二年

詔免二稅戶為民

遼時以良民賜諸寺分其稅一半輸官一半輸寺故謂之二稅戶

金

制又倣周禮大司徒三十一大比作通檢推排之法是時承正隆師旅之後民之貧富變更賦役不均世宗下詔曰粵自國初有司常行大比正隆時兵役並興調發無度富者今貧不能自存版籍所無者今為富室而猶幸免是用遣信臣泰寧節度使張宏信等十三人分路通檢天下物力而差定之以革前弊俾元元無不均之

嘆以稱朕意凡規措條理命尚書省畫一以行又命凡監戶事產除官所撥賜之外餘凡置到百姓有稅田宅皆在通檢之數五年有司奏諸路通檢不均詔再以戶口多寡貧富輕重適中定之既而又定通檢地土等第稅法十五年上以天下物力自通檢以來十餘年貧富變易賦調輕重不均遣濟南尹梁肅等二十六人分路推排後又制明安穆昆戶科差之法均其貧富及量其奴婢之多寡定之詔宰臣明安穆昆多新強舊弱差役

不均其令推排當自中都路始二十二年詔令集耆老  
推貧富驗土地牛具奴婢之數分為上中下三等以同  
知大興府事完顏烏林先推中都路續遣戶部主事譚  
達等十四人與外官同分路推排後或推排通檢之法  
舉行不一章宗泰和六年以舊定保伍法有司滅裂不  
行其令結保有匿奸細盜賊者連坐宰臣謂舊以五家  
為保恐人易為計構而難覺察遂令從唐制五家為隣  
五隣為保以相檢察京府州縣郭下則置坊正村社則

隨戶衆寡為鄉置里正以按比戶口催督賦役勸課農桑村社三百戶以上則設主首四人二百戶以上三人五十戶以上二人以下一人以佐里正禁察非違置壯丁以佐主首巡警盜賊明安穆昆部村寨五十戶以上設寨使一人掌同主首寺觀則設綱首凡坊正里正以其戶十分內取三分富民均出雇錢募強幹有担保者充人不得過百貫役不得過一年凡戶口計帳三年一籍自正月初州縣以里正主首明安穆昆則以寨使詣

編戶家責手實具男女老幼姓名以實轉報縣申州再達上司到部呈省凡漢人渤海人不得充明安穆昆戶明安穆昆之奴婢免為良者止隸本部為正戶凡籍官良人隸官籍為監戶籍官奴婢隸太府監為官戶七年勅中物力戶有役則多逃避有司令以次戶代之事畢則復業以致大損不逃之戶令省臣詳議宰臣奏舊制太輕遂命課役全戶逃者徒二年賞告者錢五萬如實銷乏者內從御史臺外從按察司體究免之宣宗貞祐



三年河北民遷徙河南者甚衆侍御史劉元規上言僑戶宜與土民均應差役上留中而自以其意問宰臣丞相布薩端平章穆延盡忠以為便尚書左丞賈益謙曰僑戶應役甚非計也河北人戶避兵而來稍息即歸今旅寓倉皇之際又與地著者並應供億必騷動不能安居上甚嘉賞興定五年省言隨處土民久困徭役客戶鬻販坐獲厚利官無所斂亦宜稍及客戶以寬土民從之

元太宗時耶律楚材條便宜事言中原之地財用所出  
宜存恤其民州縣非奉上命不得擅行科差世祖至元  
七年令縣令所屬村疇凡五十家立一社擇高年曉農  
事者為之長增至百家別設長一員不及五十家者與  
近村合為一社地遠人稀不能相合各自為社者聽其  
合為社者仍擇數村之中立社長官司長以教督農桑  
為事凡種田者立牌櫪於田側書某社某人於其上社  
長以時點視勸誡不率教者籍其姓名以授提點官責

之其有不敬父兄及兇惡者亦然仍大書所犯於門俟其改過自新乃毀如終歲不改罰其代充本社夫役社中有事不能耕種者衆為合力助之一社之中多事者兩社助之凡為長者復其身郡縣官不得以社長與科差事十年令特默齊隨處列社與編民等十三年詔民之蕩析離居及僧道漏籍諸色人不當差役者萬餘人充貴徹後又詔京師勢家等皆與民均役焉英宗至治三年詔行助役法遣使考視稅籍高下出田若干畝使

應役之人更掌之收其稅租以充役用官不得與時浙  
右苦於徭役民充坊里正者皆破家朝廷令行省召八  
郡集議便民之法杭州總管趙璉獻議以屬縣坊正為  
雇役里正用田賦以均之民稱其便泰定帝泰定二年  
命江南民戶有田一頃之上者於所輸稅外每頃量出  
助役之田具書於冊里正以次掌之歲收其租以充助  
役之用凡寺觀田除宋舊額其餘亦驗其多寡令出田  
助役民賴以不困呂思誠為修縣令差民力為三等均

其徭役又刻孔子像令社學事之印識文簿畀社長記其善惡季月報縣不孝弟不事生業者罰其輸作

明太祖洪武十四年詔天下編賦役黃冊以一百十戶為一里推丁糧多者十戶為長餘百戶為十甲甲凡十人歲役里長一人甲首一人董一里一甲之事先後以丁糧多寡為序凡十年一週曰排年在城曰坊近城曰廂鄉都曰里里編為冊冊首總為一圖其諸不能任役者附十甲後為畸零僧道給度牒有田者編冊如民科

無田者亦為畸零有司定其冊凡四一上戶部其三則布政使府縣各存一焉上戶部者謂之黃冊進呈送後湖東西二庫度藏之歲命戶科給事中一人御史一人戶部主事四人釐校訛舛其後黃冊祇具文有司徵稅編徭則自為一冊凡戶三等曰民曰軍曰匠以其業著籍人戶以籍為斷禁數姓合戶附籍漏口脫戶許自實里設老人選年高為衆所服者導民為善平鄉里爭訟其人戶避徭役者曰逃戶年饑或避兵他徙者曰流民

有故而僑於外者曰附籍朝廷所移民曰移徙凡逃戶  
明初督令還本籍復業賜復一年其不能歸與不願歸  
者令在所著籍授田輸賦英宗正統時造逃戶周知冊  
核其丁糧凡流民初令勘籍編甲互保屬所在甲長管  
轄之憲宗成化初荆襄寇亂流民百萬項忠楊璿為湖  
廣巡撫下令逐之祭酒周洪謨著流民說引東晉時僑  
置郡縣之法使近者附籍遠者設州縣以撫之都御史  
李賓上其說命原傑出撫招流民十二萬戶給閒田置

鄆陽府立上津等縣統治之凡附籍者正統時令家屬離籍千里者許收附不及千里者發還景泰中令民籍者收附軍匠竈役冒民籍者發還其移徙者明初戶部郎中劉九臯言狹鄉之民遷于寬鄉可使地無遺利太祖採其議屢有遷徙永樂中又遷太原諸郡之民以實北平焉至明代役法洪武初造黃冊成以上中下戶為三等凡應役者編第均之銀力從所便曰均徭他雜役曰雜泛二十六年定各處三等人戶仍開軍民匠等



籍除排年里甲依次充當外其大小雜泛差役各照所  
分上中下三等入戶點差景泰元年令里長戶下空間  
人丁與甲首戶下人丁皆同差成化十五年令各處差  
徭戶分九等門分三甲凡有差派定民輸納然上供京  
繇主納為中官留難不易中納往復改貿其弊甚多且  
役民自里中正辦外如糧長解戶名色甚繁因事僉編  
嘉靖後行一條鞭法通計一省丁糧均派一省徭役於  
是均徭里甲與兩稅為一小民得無擾而事亦易集然

糧長里長名罷實存條鞭規制漸紊不能盡遵也明中葉以後工役日煩京營之兵悉為所役軍政皆廢弛云

欽定續通典卷七

欽定四庫全書

欽定續通典卷八

食貨

賦稅上

唐

五代

宋

唐憲宗時分天下之賦以為三一曰上供二曰送使三曰留州宰相裴垍又令諸道節度觀察調費取於所治州不足則取於屬州而屬州送使之餘與其上供者皆輸度支後討淮西判度支楊於陵坐饋運不繼貶以司

農卿皇甫鑄代之由是益為刻剝司農卿王遂京兆尹李脩號能聚斂乃以為宣歙浙西觀察使予之富饒之地以辦財賦鹽鐵使王播言劉晏領使時自按租庸然後知州縣錢穀利病虛實乃以副使程異巡江淮覈州府上供錢穀至江淮得錢百八十五萬貫穆宗即位姑息戎臣武卒多非時賞賜饋運不能給帛粟未至而諸軍或彊奪於道蓋自建中定兩稅而物輕錢重民以為患至是四十年當時為絹二匹半者今為八匹大率加

三倍豪家大商積錢以逐輕重故農人日困末業日增  
帝亦以貨輕錢重民困而用不充詔有司議革其弊而  
議者多請重挾銅之律戶部尚書楊於陵奏王者制錢  
以權百貨貿遷有無通變不倦使物無甚貴甚賤其術  
非他在上而已何則上之所重人必從之古者權之於  
上今索之於下昔散之四方今藏之公府昔廣鑄以資  
用今減鑪以廢功開元中天下鑄錢七十餘鑪歲盈百  
萬今纔十數鑪歲僅十五萬而已大厯以前淄青太原

魏博雜鉛鐵以通時用嶺南雜以金銀丹砂象齒今一  
用錢貨故錢不足宜使天下兩稅權酒鹽利上供及留  
州送使錢悉輸以布帛穀粟則人寬於所求然後出內  
府之所積收市廛之滯廣山鑄之數限邊裔之出禁私  
家之積則貨日重而錢日輕矣宰相善其議由是兩稅  
留州皆易以布帛絲繡租庸課調不計錢而納布帛唯  
鹽酒本以權率計錢與兩稅異不可去錢太和九年以  
天下回殘錢置常平義倉本錢歲增市之非遇水旱不

增者判官罰俸書下考文宗嘗召監倉御史崔虞問太倉粟數對以二百五十萬石帝曰今歲用廣而蓄少奈何乃詔出使郎官御史督察州縣壅遏錢穀者時豪民侵噬產業不移戶州縣不敢徭役而征稅皆出下貧至於依富為奴客役罰峻於州縣長吏歲輒遣吏巡覆田稅民苦其擾宣宗以後四方兵興役重賦繁公私俱困竭矣初乾元末天下上計百六十九州戶百九十三萬一百三十四不課者百七十萬四千五百九十二口千

六百九十九萬三百八十六不課者千四百六十一萬  
九千五百八十七減天寶戶五百九十八萬二千五百  
八十四口三千五百九十二萬八千七百二十三元和  
中供歲賦者浙西浙東宣歙淮南江西鄂岳福建湖南  
八道戶百四十四萬比天寶開元四之一兵食於官者  
八十三萬加天寶三之一通以二戶養一兵京西北河  
北以屯兵廣無上供至長慶中戶三百三十五萬而兵  
九十萬率三戶以奉一兵至武宗即位戶二百一十一



萬四千九百六十會昌末戶增至四百九十五萬五千一百五十一宣宗既復河湟天下兩稅權酒茶鹽錢歲入九百二十二萬緡歲之常用率少三百餘萬有司遠取後年乃濟及羣盜起諸鎮不復上計云

後唐莊宗同光三年勅城內店宅園圃比來無稅頃因僞命遂有配徵後來以所徵物色添助軍裝衣賜將令通濟宜示矜蠲今據緊慢去處於見輸稅絲每兩作三等酌量納錢其絲仍與除放吏部尚書李琪上疏謂救

人瘼者以重歛為病源料兵食者以惠能為軍政伏惟  
深留宸鑒如以六軍方闕未可輕徭兩稅之餘猶須重  
歛則但不以折納為事一切以本色輸官又不以紐配  
為名止以正稅加納天下幸甚勅本朝徵科唯配有兩  
稅至於折納本不施為宜依李琪所論應逐年合納錢  
物斛斗鹽錢等宜令租庸司指揮並准元徵本色輸納  
明宗天成四年戶部奏三京鄴都諸道州府逐年所徵  
夏秋稅租兼折徵諸般錢穀等徵條流所有各處節候

早晚以差等作期納足長興三年三司奏請諸道上供稅物充兵士衣賜不足其天下所納斛斗及錢除支贍外請依時折納綾羅絹帛從之

晉高祖天福四年勅應諸道節度刺史不得擅加賦役及於縣邑別立監徵所納田租委人戶自量自槩

周世宗顯德三年勅應天下今後公私織造到絹帛紬布綾羅錦綺及諸色匹帛其幅尺筋兩並須合向來制度不得輕弱假偽妄冒取價又勅舊制織絕絹布綾羅

錦綺紗縠等幅其幅濶俱有準制來年所納官絹觔兩  
不得差誤

宋制歲賦之類有五公田之賦凡田之在官賦民耕而  
收其租者民田之賦百姓各得專之者城郭之賦宅稅  
地稅之類丁口之賦百姓歲輸身丁錢米雜變之賦牛  
革蠶鹽之類太祖建隆四年令諸州受民租籍不得稱  
分毫合餉銖釐絲忽錢必成文絹帛成尺粟成升絲絹  
成兩薪蒿成束金銀成錢開寶三年詔諸州府兩稅所

科物非土地所宜者不得抑配八年詔今後民輸稅紬絹不滿匹者許計丈尺納價錢毋得以三戶五戶聚合成匹送納煩擾真宗大中祥符元年以連歲豐稔邊儲有備河北諸路賦稅並聽於本州軍輸納二年頒募職州縣招徠戶口旌賞條制九年詔諸路支移稅賦勿至兩次仍許以粟麥蕎菽互相折輸凡歲賦穀以石計錢以緡計帛以匹計金銀絲緡以兩計蠶秸薪蒸以圍計他物各以數計至道末總七千八十九萬三千自唐以

來民計田輸賦外增取他物復折為賦謂之雜變亦謂之沿納名品煩細其類不一官司歲附帳籍並緣侵擾民以為患仁宗明道中詔三司以類併合於是悉除諸名品併為一物夏秋稅第分粗細二色百姓便之諫官王素奏天下田賦輕重不等請均定歐陽修亦言秘書丞孫琳嘗往洺州肥鄉縣與大理寺丞郭諮以千步方田法括定民田願詔二人者任之三司亦以為然且請擇諸州之尤不均者均之於是遣郭諮往蔡州括一縣

得田二萬六千九百三十餘頃均其賦於民後以州縣多逃田未可盡括遂罷初湖廣閩浙因舊制歲歛丁身錢米大中祥符間詔除丁錢而米輸如故既而漸次蠲免自郭諮均稅之法罷論者謂朝廷徒恤一時之勞而失經遠之意至皇祐中天下墾田視景德增四十一萬七千餘頃而稅穀乃減七十一萬八千餘石田賦不均故其弊滋甚後田京知滄州均無棣田蔡挺知博州均聊城高唐田歲增賦穀帛無棣總一千一百五十二聊

城高唐總萬四千八百四十七乃復詔均定遣官分行  
諸路秘書丞高本在遣中獨以為不可纔均數郡田而  
止神宗元豐二年詔諸路支移折稅並具所行月日上  
之中書權發三司戶部判官李琮根究逃絕稅役江浙  
所得逃戶凡四十萬一千三百有奇為書上之明年除  
琮淮南轉運副使兩路凡得逃絕詭名挾佃簿籍不載  
并闕丁凡四十七萬五千九百有奇正稅并積負凡九  
十二萬二千二百貫石匹兩有奇然每遇水旱輒輕弛



賦租或蠲放倚閣賦輸遠方不均皆遣使按之陝西轉運使呂大忠令農戶支移斗輸腳錢十八御史劾之乃定制均輕重之等以稅賦戶籍在第一等第二等者支移三百里三等四等者二百里五等一百里不願支移而願輸道里腳價者亦酌度分為三等以從其便徽宗崇寧二年諸路歲稔遂行增價折納之法民以穀菽物帛輸積負零稅者聽之又詔天下租賦科撥價折當先富後貧自近及遠乃者漕臣失職有不均之弊其定為

令支移本以便邊餉內郡罕用折變之法視歲豐稔以定物之低昂俾官吏毋得私其輕重又詔比閭慢吏廢期凡輸官之物違期促限蠶者未絲農者未獲追胥旁午民無所措自今前期督輸者加一等坐之致民逃徙者論更加等政和以後天下戶口類多不實於是立法比較鈎考歲終會其數按籍槩括脫漏又詔諸路凡奏戶口令提刑司及提舉常平司參考保奏終莫能極其弊故租稅亦不得而均是時國用不給凡府畿之外南

暨襄唐西及澠池北踰大河民田有溢於初券者輒使  
輸公田錢宣和初州縣主吏催科失職逋租數廣令轉  
運司察守貳勤情聽專達於內侍省浙西荒田天荒草  
田葑茭蕩湖濼退灘等皆計籍名佃立租以供應奉置  
局命官有措置水利農田之名部使者且自督御前租  
課高宗紹興元年五月詔民力久困州縣因緣為奸今  
頒式諸路凡因軍期不得已而貸於民者並許計所用  
之多寡量物力之輕重依式開具使民通知凡稅額減

去大觀三分之一十五年戶部議准法輸官物用四鈔  
戶鈔付民執憑縣鈔關縣司銷簿監鈔納官掌之住鈔  
倉庫藏之所以防冒偽備毀失也繼而兩浙州縣合輸  
綿紬稅絹茶絹雜錢米六色皆以市價折錢却別科米  
麥有畝輸四五斗者京西括田租加於舊湖南有土戶  
錢折絕錢醋息錢麵引錢名色不一荆南戶口十萬寇  
亂以來幾無人迹議者希朝廷意謂流民已復可使歲  
輸十二積逋至二十餘萬緡民力重困右承議郎魯冲

上書論郡邑之弊以臣前任宜興一縣言之漕計合收  
其名甚繁有丁鹽坊場課利錢租地錢租絲租紬錢每  
歲不過一萬五千餘緡其發納之數有大軍錢上供錢  
糴本錢造船錢軍器物料錢天申節銀絹錢之類歲支  
不啻三萬四千餘緡又有見任寄居官請奉過往官兵  
批券州郡督索拖欠畧無虛日今之為令者苟以寬恤  
為意而拙於催科旋踵以不職罷何暇承流宣化哉吏  
部侍郎許興古言今銓曹有知縣令二百餘闕無願就

者正緣財賦督迫所以畏避如此若蠲民積欠謹擇守臣則吏稱民安矣詔如所奏行而兩浙江東西積逋悉蠲焉孝宗淳熙五年詔曰比年以來五穀豐登蠶絲盈箱嘉與海內共享阜康之樂尚念耕夫蠶婦終歲勤動價錢不足以償其勞郡邑兩稅除折帛折變自有常制當輸正色者毋以重價強之折錢臨安府刻石徧賜諸路光宗紹熙元年臣僚言古者賦租出於民之所有不强其所無今之為絹者一倍折而為錢再倍折而為銀

銀愈貴錢愈艱得穀愈不可售使民賤糶而貴折則大  
熟之歲反為民害願詔州郡凡多取而多折者重置於  
罰民有糶不售者令常平就糶異時歲歉平價以糶度  
於民無傷於國有補詔從之秘書監楊萬里奏輸粟於  
民謂之苗舊以一斛輸一斛今以二斛輸一斛矣輸帛  
於官謂之稅舊以正絹為稅絹今正絹外有和買矣舊  
和買官給其直或以錢或以鹽今皆無之又以絹估直  
而倍折其錢矣舊稅畝一錢輸免役一錢今歲增其額

不知所止矣既一倍其粟數倍其帛又數倍其錢而又  
有月椿錢版帳錢不知幾倍於祖宗之舊又幾倍於漢  
唐之制乎此猶東南之賦可知也至於蜀賦之額外無  
名者不可得而知也陛下欲薄賦斂當節用度用節而  
後財可積財積而後國可足國足而後賦可減賦減而  
後民可富民富而後邦可寧也二年乃詔郡守縣令毋  
得科斂先期競務辦集理宗嘉熙二年臣僚言陛下自  
登大寶蠲賦之詔無歲無之而百姓未霑實惠蓋民輸



率先期歸於吏胥攬戶乃遇詔下則所放者吏胥之物  
所倚閹者攬戶之錢是以寬恤之詔雖頒然民未需惠  
嘗觀漢史恤民之詔多減明年田租今宜倣漢故事如  
遇朝廷行大惠則以今年下詔明年減租示民先知減  
數則吏難為欺民慶實賜矣從之淳祐八年監察御史  
宗政殿說書陳求魯奏本朝仁政有餘而王制未備今  
之兩稅本大厯之弊法也常賦猶足困民況預借乎以  
百畝之家計之罄其永業豈足支數年之借操縱出於

權宜官吏得以簸弄公私俱困臣愚謂今日救弊之策其大端有四焉宜採夏侯太初併省州縣之議俾縣令得以直達於朝廷用宋元嘉六年為斷之法俾縣令得以究心於撫字法藝祖出朝紳為令之典以重其權遵光武擢卓茂為三公之意以激其氣然後為之正其經界裁其橫斂則預借可革民亦獲利矣議者以為切於當時之弊然宋自南渡以後川蜀之賦最重科斂繁多有諸路常平司坊場錢激賞絹奇零絹估錢布估錢常

平積年本息對糴米及他酒鹽諸名色錢大抵於常賦  
外歲增錢二千六十八萬緡而茶不預焉軍儲稍充蜀  
民始困後雖屢經蠲減而其弊不去天下諸郡每年常  
貢京畿路開封府貢方紋綾方紋紗蘆席麻黃酸棗仁  
京東路青州貢仙紋綾梨棗密州貢絹牛黃濟南府貢  
綿絹陽起石防風沂州貢仙靈脾紫石英茯苓鍾乳登  
州貢金牛黃石器萊州貢牛黃海藻牡礪石器濰州貢  
綜絲素絕淄州貢綾防風長理石淮陽軍貢絹應天府

貢絹襲慶府貢大花綾墨雲母紫石英防風茯苓徐州  
貢雙絲綾紬絹興仁府貢絹葶子東平府貢絹阿膠  
濟州貢阿膠單州貢蛇床防風濮州貢絹京西路襄陽  
府貢麝香白殼漆器鄧州貢白菊花隨州貢絹綾葛覆  
盆子金州貢麴金麝香枳殼實杜仲白膠香黃檗房州  
貢麝香紵布鍾乳石笋均州貢麝香唐州貢絹河南府  
貢蜜蠟磁器潁昌府貢絹蕉席鄭州貢絹滑州貢絹孟  
州貢梁米蔡州貢綾淮寧府貢紬絹順昌府貢紬絕綿

汝州貢絁絹信陽軍貢紵布河北路大名府貢花絁綿  
絁平絁紫草開德府貢蓂莢席南粉滄州貢大絁大柳  
箱冀州貢絹河間府貢絹博州貢平絹棣州貢絹鄭州  
貢綿雄州貢絁霸州貢絹德州貢絹濱州貢絹思州貢  
白氈永靖軍貢簞絹清州貢絹信安軍貢絹保定軍貢  
絁真定府貢羅相州貢暗花牡丹花紗知母胡粉絹建  
德府貢白紵簞衛州貢絹綿洺州貢絁深州貢絹祁州  
貢花絁慶源府貢絹綿保州貢絹安肅軍貢素絁廣信

軍貢紬順安軍貢絹河北路太原府貢大銅鑑甘草人  
參礬石隆德府貢人參蜜墨平陽府貢蜜蠟燭絳州貢  
防風蠟燭墨澤州貢白石英禹餘糧人參代州貢麝香  
青碌忻州貢解玉砂麝汾州貢土絕石膏遼州貢人參  
憲州貢麝香嵐州貢麝香石州貢蜜蠟隰州貢蜜蠟麟  
州貢柴胡府州貢甘草豐州貢甘草柴胡威勝軍貢土  
絕平定軍貢絹岢嵐軍貢絹寧化軍貢絹火山軍貢柴  
胡保德軍貢絹陝西路京兆府貢韃韃蠟席酸棗仁地

骨皮解州貢鹽花陝州貢紬絕括萋根栢子仁商州貢  
麝香枳殼實號州貢麝香地骨皮硯同州貢白蒺藜生  
熟乾地黃華州貢茯苓細辛茯苓神耀州貢瓷器延安府  
貢黃蠟麝香鄜州貢麝香後改貢蠟燭坊州貢弓弦麻  
席保安軍貢毛段蓂蓉慶陽府貢紫茸白花檀麝香黃  
蠟環州貢甘草邠州貢火筋華豆剪刀寧州貢菴閭荆  
芥硯席秦州貢席芎藭鳳翔府貢蠟燭榛實席成階州  
貢羚羊角蠟燭渭州貢紬蓂蓉涇州貢紫茸毛毼段原

州貢甘草德順軍貢甘草鎮戎軍貢白氈熙州貢毛氈  
段麝香鞏州貢麝香蘭州貢甘草兩浙路臨安府貢綾  
藤紙紹興府貢越綾輕紗紙平江府貢葛蛇床子白石  
脂花席鎮江府貢羅綾湖州貢白紵婺州貢綿藤紙慶  
元府貢綾乾山獐烏賊魚骨常州貢白紵紗席瑞安府  
貢鮫魚皮蠲紙台州貢甲香鮫魚皮處州貢綿黃連  
衢州貢綿藤紙建德府貢白紵葦嘉興府貢綾淮南路  
揚州貢白苧布莞席銅鏡亳州貢縐紗絹宿州貢絹楚



州貢苧布海州貢絹獐皮鹿皮泰州貢隔織滁州貢絹  
興州貢麻紙通州貢獐皮鹿皮鯨膠安東州貢葛布石  
斛廬州貢紗絹蘄州貢苧布蕪安慶府貢白朮濠州貢  
絹糟魚光州貢石斛葛布黃州貢苧布連翹無為州貢  
絹江寧府貢筆寧國府貢紵布黃連筆徽州貢白苧紙  
池州貢紙紅白薑饒州貢麩金竹簞信州貢蜜葛粉水晶  
器太平州貢紗南康州貢茶芽廣德軍貢茶芽隆興府  
貢葛江州貢雲母石斛贛州貢白苧吉州貢苧布袁州

貢紵布撫州貢葛瑞州貢紵興國軍貢紵南安軍貢紵  
臨江軍貢絹建昌軍貢絹荆湖南北路江陵府貢綾紵  
碧澗茶芽柑橘鄂州貢銀德安府貢青紵常德府貢紵  
布練布澧州貢五加皮芒硝杜若峽州貢綾竹簾岳州  
貢紵歸州貢紵辰州貢硃砂水銀沅州貢硃砂水銀靖  
州貢白絹潭州貢葛茶衡州貢麩金犀通州貢白苧零  
陵香永州貢葛石燕郴州貢紵實慶府貢犀角銀全州  
貢葛零陵香桂陽州貢銀福建路福州貢荔枝鹿角菜


紫菜建寧府貢火箭石乳龍茶元豐貢龍鳳等茶泉州  
貢松子元豐貢綿蕉葛橄欖淳祐貢苧布南劍州貢土  
茴香元豐貢茶漳州貢甲香鯪魚皮柑橘汀州貢蠟燭  
邵武軍貢紵興化軍貢綿葛布成都府路成都府貢花  
羅錦高紵牋紙眉州貢春羅單絲羅綿州貢綾紵布漢  
州貢紵布嘉定府貢麤金邛州貢絲布簡州貢綿紬麤  
金黎州貢紅椒雅州貢麤金茂州貢麝香威州貢當歸  
羌活仙升監貢苦藥子續隨子潼州府路潼州府貢綾

曾青空青遂寧府貢擣蒨綾順慶府貢絲布天門冬資  
州貢麩金普州貢葛天門冬昌州貢麩金絹叙州貢葛  
合州貢牡丹皮白藥子榮州貢班布渠州貢綿紬買子  
永懷安軍貢紬寧西軍貢絹利州路興元府貢胭脂紅  
花利州貢金銅鐵洋州貢隔織閬州貢蓮綾隆慶府貢  
巴戟巴州貢綿紬沔州貢蜜蠟蓬州貢紵絲綾綿紬鎮  
州貢麩金羚羊角夔州路紹慶府貢硃砂蠟施州貢黃  
蓮沒藥咸淳州貢綿紬萬州貢金木藥子開州貢白紵

達州貢紬涪州貢絹重慶府貢葛布牡丹皮雲安軍貢  
絹梁山軍貢綿大寧監貢蠟廣南東路廣州貢胡椒石  
髮糖霜檀香肉豆蔻丁香母子零陵香補骨脂舶上茴  
香沒藥沒石子元豐貢沉香甲香詹糖香石斛龜殼水  
馬鬣皮藤簾韶州貢絹鍾乳循州貢絹藤潮州貢蕉布  
甲香鯊魚皮連州貢苧布官桂元豐貢鍾乳梅州貢銀  
布南雄州貢絹英德府貢紵布賀州貢銀封州貢銀肇  
慶府貢銀石硯新州貢銀德慶府貢銀南恩州貢銀惠

州貢甲香藤箱廣南西路靜江府貢銀桂心容州貢銀  
硃砂邕州貢銀融州貢金桂心象州貢金藤器榑子昭  
州貢銀梧州貢銀藤州貢銀龔州貢銀潯州貢銀柳州  
貢銀貴州貢銀慶遠府貢生豆蔻草豆蔻元豐貢銀賓  
州貢銀藤器橫州貢銀化州貢銀高良薑高州貢銀雷  
州貢高良薑元豐貢斑竹欽州貢高良薑翡翠毛白州  
貢銀縮砂鬱林州貢縮砂廉州貢銀瓊州貢銀檳榔  
南寧軍貢高良薑元豐貢銀萬安軍貢銀吉陽軍貢高

良薑



欽定續通典卷八



# 欽定四庫全書

史部

欽定續通典卷十九

詳校官監察御史臣曹錫寶

洗馬臣王坦修覆勘

校對官中書臣顧宗泰

謄錄舉人臣汪鳴

欽定四庫全書

欽定續通典卷九

食貨

賦稅下

遼

金

元

明

遼賦稅之制自太祖任韓延徽始制國用太宗籍五京  
戶丁以定賦稅聖宗太平七年詔諸在屯者力耕公田  
不輸稅賦比公田制也十五年募民耕灤河曠地十年  
始納租比在官閑田制也又詔山前後未納稅戶並於

密雲燕樂兩縣占田置業入稅比私田制也各部大臣從上征伐俘掠人戶自置郭郭為頭下軍州凡市井之賦即歸之此頭下軍州賦制也其餘若南京歲納三司鹽鐵錢折絹大同歲納三司稅錢折粟又開遠軍民歲輸稅向例斗粟折五錢耶律穆濟守郡時表請折六錢各隨地異宜當時稱為利民之政焉

金制官地輸租私田輸稅其輸租之制不傳大率分田之等為九而差次之夏稅畝取三合秋稅畝取五升又

納結一束每束計十有五觔夏稅六月至八月止秋稅  
十月至十二月止分為初中末三限州三百里以外者  
紓其期一月屯田戶佃官地者有司移明安穆昆督之  
章宗泰和五年改秋稅以十一月為初限中都西京北  
京上京遼東臨潢陝西地寒稼穡遲熟夏稅以七月為  
初限凡輸送粟麥在三百里外者石減五升以上每三  
百里遞減五升粟折結百秤者百里內減三秤二百里  
減五秤不及三百里減八秤三百里及輸本色橐草各

減十秤計民田園邸舍車乘牧畜種植之資藏鏹之數徵錢有差謂之物力錢過差科必按版籍先及富者勢均則以丁多寡定甲乙其或不可分析者率以次戶濟之宣宗興定四年鎮南軍節度使溫特赫思敬上書言今民輸稅其法大抵有三上戶輸遠倉中戶次之下戶最近然近者不下百里遠者數百里計道路之費倍於所輸而雨雪有稽違之責遇賊有死傷之患不若止輸本郡令有司檢算倉之所積稱屯兵之數使就食之若

有不足則增斂於民民計所斂不及道里之費將忻然從之矣此外又有牛頭稅即牛具稅明安穆昆部女直戶輸之稅也其制每耒牛三頭為一具限民口二十五受田四頃四畝有奇歲輸粟不過一石官民占田無過四十具太宗天會三年以歲稔官無儲積無以備饑饉詔令一耒賦粟一石每穆昆別為一廩貯之四年詔內地諸路每牛一具賦粟五斗為定制世宗大定元年詔諸明安不經遷移者徵牛具稅粟即命穆昆監其倉有

全一  
卷九  
虧損則坐之二十三年以版籍歲久貧富不同明安穆  
昆又皆年少不練時事一旦軍興按籍徵之必有不均  
之患乃令驗實推排閱其戶口畜產之數尚書省詳定  
入奏

元之取民大率以唐為法其取於內郡者曰丁稅曰地  
稅此倣唐之租庸調也取於江南者曰秋稅曰夏稅此  
倣唐之兩稅也丁稅地稅之法自太宗始行之初每戶  
科粟二石後又以兵食不足增為四石至丙申年乃定

科徵之法令諸路驗民戶成丁之數每丁歲科粟一石  
驅丁五升新戶半之老幼不與其間有耕種者或驗其  
牛具之數或驗其土地之等徵焉丁稅少而地稅多者  
納地租地稅少而丁稅多者納丁稅工匠僧道驗地官  
吏商賈驗丁虛配不實者罪之仍命歲書其數於冊由  
課稅所申省以聞世祖申明舊制於是輸納之期收受  
之式關防之禁會計之法莫不備焉中統二年命遠倉  
之糧止於沿河近倉輸納每石帶收腳價中統鈔三錢



或民戶赴河倉輸納者每石折輸輕賣中統鈔七錢五年詔僧道儒人等凡種田者白地每畝輸稅三升水地每畝五升軍站戶除地四頃免稅餘悉徵之至元三年詔寫戶種田他所者其丁稅於附籍之郡驗丁其地稅於種田之所驗地漫散之戶逃於河南等路者依見居民戶細稅八年又定西夏中興路西寧州烏梁海三處之稅其數與前僧道同十七年遂命戶部大定諸例全科戶丁稅每丁粟三石驅丁粟一石每畝粟三升減半

科戶丁稅每丁粟一石新收交參戶第一年五斗第三  
年一石二斗五升第四年一石五斗第五年一石七斗  
五升第六年入丁稅協濟戶丁稅每丁粟一石地稅每  
畝粟三升隨路近倉輸粟如在遠倉每粟一石折納輕  
贖鈔二兩富戶輸遠倉下戶輸近倉每石帶納鼠耗三  
升分例四升凡糧到倉以時收受其輸納之期分為三  
限初限十月中限十一月末限十二月成宗大德六年  
申明稅糧條例復定上都河間輸納之期上都初限以

次年五月中限六月末限七月河間初限九月中限十月末限十一月至於秋稅夏稅之法惟行於江南初世祖平宋時除江東浙西其餘獨徵秋稅而已至元十九年用姚元之請命江南稅糧依宋舊例折輸綿絹雜物尋又令輸米三之一餘並折鈔以七百萬為率歲得羨鈔十四萬錠其輸米者止用宋斗斛蓋以宋一石當七斗故也二十八年又命江淮寺觀田宋時舊有者免租續置者輸稅至成宗元貞二年始定徵江南夏稅之制

於是秋稅止命輸租夏稅則輸木棉布絹絲綿等物其所輸視糧之數每糧一石者輸鈔自三貫以至一貫五百文有差輸三貫者若江浙省婺州等路江南省龍興等路輸一貫者若福建省泉州等五路輸一貫五百文者若江浙省紹興路福建省漳州等五路皆因其地利之宜人民之衆酌其中數而取之其折輸之物各隨時估之高下以為值獨湖廣則異於是初阿爾哈雅克湖廣時罷宋夏稅依中原例改科門攤每戶一貫二錢視

夏稅約增鈔五萬餘錠大德三年改門攤為夏稅而併徵之每石計三貫四錢有贏視江浙江西為差重云其在官之田許民佃種若江北兩淮等處荒閑之地令佃種至第三年輸租後又以地廣人稀更寬令第四年始輸凡係官田則夏稅皆不科泰定之初又有所謂助役糧者其法命江南民戶有田一頃以上者於所輸稅外每頃量出助役之費具書於冊里正以次掌之歲收其入凡寺觀田除宋舊額其餘亦驗其多寡令出助役焉

天下歲入糧數腹裏二百二十七萬一千四百四十九石江浙省四百四十九萬四千七百八十三石江西省一百十五萬七千四百四十八石湖廣省八十四萬三千七百八十七石遼陽省七萬二千六十六石河南省二百五十九萬一千二百六十九石四川省十一萬六千五百七十四石陝西省二十二萬九千二十三石甘肅省六萬五百八十六石雲南省二十七萬七千七百十九石其江浙等三省夏稅以天歷元年鈔數計之江

浙省五萬七千八百三十錠四十貫江西省五萬二千八百九十五錠十一貫湖廣省一萬九千三百七十八錠二貫此外復有科差之法其名有二曰絲料曰包銀各驗其戶之上下而科焉絲料之法太宗丙申年始行之每二戶出絲一觔并隨路絲線顏色輸於官包銀之法憲宗乙卯年始定每包銀四兩一半輸銀其半折收絲絹等物至世祖中統元年立十路宣撫司定戶籍科差條例然戶各不一有元管戶交參戶漏籍戶協濟戶





月三年又命絲料限無過七月包銀限無過九月及平江南其制益廣至元二十八年以至元新格定科差法諸差稅皆司縣正官監視人吏置局均科諸夫役皆先富強後貧弱其貧富等者先丁多之戶後丁少之戶成宗大德六年又定絲料限八月包銀俸鈔限九月布限十月大率因世祖之舊而增損之云科差總數以中統四年計之絲七十一萬二千一百七十一觔鈔五萬六千一百五十八錠其後逐年遞增逮及至元四年絲一

百九萬六千四百八十九觔鈔七萬八千一百二十六  
錠天厯元年包銀差發總數凡鈔九百八十九錠貳一  
百十三萬三千一百十九索絲一百九萬八千八百四  
十三觔絹三千五百三十疋綿七萬二千十五觔  
布二十五萬一千二百二十三疋

明制賦役之法一以黃冊為準冊有丁有田丁有役田  
有租曰夏稅曰秋糧凡二等夏稅無過八月秋糧無過  
明年二月丁曰成丁曰未成丁凡二等役曰里甲曰均

徭曰雜泛凡三等以戶計曰甲役以丁計曰徭役上命  
非時曰雜役皆有力役有雇役兩稅洪武時夏稅曰米  
麥曰錢鈔曰絹秋糧曰米曰錢鈔曰絹弘治時會計之  
數夏稅曰大小米麥曰麥收曰絲綿并荒絲曰稅絲曰  
絲綿折絹曰稅絲折絹曰本色絲曰農桑絲折絹曰農  
桑零絲曰人丁絲折絹曰改科絹曰棉花折布曰苧布  
曰土苧曰紅花曰麻布曰鈔曰租鈔曰稅鈔曰原額小  
絹曰幣帛絹曰本色絹曰絹曰折色絲秋糧曰米曰租

鈔曰賃鈔曰山租鈔曰租絲曰租絹曰租粗麻布曰課程棉布曰租苧布曰牛租米穀曰地畝棉花絨曰棗子易米曰棗株課米曰課程苧麻折米曰棉布曰魚課米曰改科絲折米萬厯時小有所增損大略以米麥為主而絲絹與鈔次之夏稅之米唯江西湖廣廣東廣西麥敢唯貴州農桑絲遍天下唯不及川廣雲貴餘各視其地產此明代賦役制之大概也太祖初立國即下令凡民田五畝至十畝者栽桑麻木棉各半畝十畝以上倍

之麻畝徵八兩木棉畝四兩栽桑以四年起科不種桑  
出絹一疋不種麻及木棉出麻布棉布各一疋此農桑  
絲絹所由起也洪武九年天下稅糧令民以銀鈔錢絹  
代輸銀一兩錢千文鈔十貫皆折輸米一石小麥則減  
直十之二棉貯一疋折米六斗麥七斗麻布一疋折米  
四斗麥五升絲絹等各以輕重為損益願輸米者聽十  
七年雲南以金銀貝布漆丹砂水銀代秋租於是謂米  
麥為本色而諸折納稅糧者謂之折色越二年又令戶

部侍郎楊靖會計天下倉儲存糧二年外並收折色唯  
以北方諸布政司需糧餉邊仍使輸粟三十年諭戶部  
自二十八年以前天下逋租咸許任土所產折收米絹  
棉花及金銀等物著為令於是戶部定鈔一錠折米一  
石金一兩十石銀一兩二石絹一疋石有二斗棉布一  
疋一石苧布一疋七斗棉花一斤二斗帝曰折收逋賦  
蓋欲蘇民困也今賦重若此將愈困民金銀每兩折米  
加一倍鈔止二貫五百文折一石餘從所議成祖永樂

中既得交趾以絹漆蘇木翠羽紙扇沉速安息諸香代  
租賦廣東瓊州黎人肇慶徭人內附輸賦比內地天下  
本色稅糧三千餘萬石絲鈔等二千餘萬計是時米粟  
自輸京師數百萬石外府縣倉廩蓄積豐滿歲貢銀三  
十萬兩有奇而民間交易用銀仍有厲禁英宗正統元  
年副都御史周銓言行在各官俸支米南京道遠用度  
甚多輒以米易貨貴買賤售十不及一朝廷虛糜廩祿  
各官不得實惠請於南畿浙江江西湖廣不通舟楫地

折收布絹白金解京充俸江西巡撫趙新亦以為言戶部尚書黃福復條以請帝以問行在戶部尚書胡濙濙對以太祖嘗折納稅糧於陝西浙江民以為便遂倣其制米麥一石折銀二錢五分南畿浙江江南湖廣福建廣東廣西米麥共四百餘萬石折銀百萬餘兩輸內承運庫謂之金花銀其後概行於天下自起運兌軍外糧四石收銀一兩解京以為永例諸方賦稅折銀而倉廩之積漸少矣明初官民田賦凡官田畝稅五升三合民



田減二升重租田八升五合五勺沒官田一斗二升唯蘇松嘉湖籍諸豪族及富民田以為官田按私租簿為稅額而司農卿楊憲又以浙西地膏腴增其賦畝加二倍故浙西官民田視他方倍蓰畝稅有二三石者洪武十三年命戶部裁其額畝科七斗五升至四斗四升者減十之二四斗三升至三斗六升者俱止徵三斗五升其以下者仍舊惠帝建文二年詔曰江浙賦獨重而蘇松準私租起科特以懲一時頑民豈可為定則以重困

一方宜悉與減免畝不得過一斗成祖革建文政浙西  
之賦復重宣宗即位廣西布政使周幹巡視蘇常嘉湖  
諸府民多逃亡詢之耆老皆云重賦所致如吳江崑山  
民田租舊畝五升小民佃種富民田畝輸私租一石復  
因事故輸官輒如私租例盡取之十分取八民猶不堪  
況盡取乎請將沒官田及公侯還官田租俱視彼處官  
田起科畝稅六斗宣德四年令江南府縣官督察各屬  
糧屯

按明洪武四年令天下有司度民田以萬石為準設糧長一名專督其鄉賦稅

凡有倚恃

富豪交結有司承攬軍需買辦移用米糧假以風濤漂  
流為詞重復追徵者重加究治又令推陞郎中員外及  
御史長史等六員為各部侍郎分往浙江江南湖廣河  
南山東山西等布政司并南北直隸府州縣督收稅糧  
五年二月詔舊額官田租畝一斗至四斗者各減十之  
二四斗一升至一石以上者減十之三著為令於是江  
南巡撫周忱等曲計減蘇糧七十餘萬他府以為差正  
統元年令蘇松浙江等處官田準民田起科糧四斗一

升至一石以上者減作三斗二斗一升以上至四斗者  
減作二斗一斗一升至二斗者減作一斗景帝景泰十  
三年奏准兩京農桑夏稅絹匹不及五十匹以上者俱  
送該府掌印官看驗又令各司府州縣夏稅農桑絹匹  
務織造緊密厚重雙經雙緯淨織鈔尺長三丈二尺濶  
二尺每五十匹作一束印封糧長大戶人等赴部交納  
天順時令鎮守浙江尚書孫原貞等定杭嘉湖則例以  
起科重者徵米宜少起科輕者徵米宜多乃定官田畝

科一石以下民田七斗以下者每石歲徵平米一石三斗民田四斗以下者每石歲徵平米一石五斗官田二斗以下民田二斗七升以下者每石歲徵平米一石七斗官田八升以下民田七升以下者每石歲徵平米二石二斗凡重者輕之輕者重之欲使科則適均而畝科一石之稅未嘗減云世宗嘉靖二年御史黎貫言國初夏秋二稅麥四百七十餘萬石今少九萬米二千四百七十餘萬石今少二百五十餘萬而宗室之蕃官吏之

冗內官之衆軍士之增悉取給其中賦稅則日損支用  
則日加請覈祖宗賦額及經費多寡之數一一區畫於  
是戶部議令天下官吏考滿遷秩必嚴覈任內租稅徵  
解足數方許給由交代仍乞朝廷躬行節儉帝納之既  
而諭德顧鼎臣條上錢糧積弊四事一曰察理田糧舊  
額請責州縣官於農隙時令里甲等做洪武正統間魚  
鱗風旗之式編造圖冊細列原額田糧字圩則號條段  
冊荒成熟步口之數官為覆勘分別界址履畝檢踏丈

量具開墾改正豁除之數刊刻成書收貯官庫給散里中永為稽考一曰催徵歲辦錢糧成弘以前里甲催徵糧戶上納糧長收斛州縣監收糧長不敢多收斛面糧戶不敢雜以水穀糠粃兌糧官軍不敢阻難多索近者有司不復比較經催里甲負糧人戶但立限追比糧長令下鄉追徵豪強者則大斛倍收多方索取孱弱者為勢豪所凌不免變產補納至或舊役侵欠責償新簽且往時每區糧長不過正副二名近多至十人以上其實

收掌管糧之數少而科斂打點使用年例之數多州縣  
一年之間輒破中人百家之產害莫大焉宜令戶部議  
定事例轉行所司審編糧長務遵舊規又其二則遣官  
綜理及復預備倉法也時議雖不行切中時弊至十八  
年鼎臣為大學士復言蘇松常鎮嘉湖杭七府供輸甲  
天下而里胥豪右蠹弊特甚宜將欺隱及坍荒田土一  
一檢覈改正於是應天巡撫歐陽鐸檢荒田二千餘頃  
計租十一萬石有奇以所欺隱田糧六萬餘石補之餘



請豁免時嘉興知府趙瀛建議田不分官民稅不分等則一切以三斗起徵鐸乃與蘇州知府王儀盡括官民田畝益之履畝清丈定為等則所造經賦冊以八事定稅糧曰元額稽始曰事故除虛曰分項別異曰歸總正實曰坐派起運曰運餘撥存曰存餘考積曰徵一定額又以八事考里甲曰丁田曰慶賀曰祭祀曰鄉飲曰科賀曰郵政曰公費曰備用以三事定均徭曰銀差曰力差曰馬差著為例徵一者總徵銀米之凡而計畝均輸

之其科則最重與最輕者稍以耗損益推移重者不能盡損唯遞減耗米派輕賁拆除之陰予以輕輕者不能加益為徵本色遞增耗米加乘之陰予以重時豪右多梗其議鼎臣獨以為善顧其時上不能損賦額長民者私以己意變通由是官田不至偏重而民田之賦愈加矣時又有綱銀一串鈴諸法綱銀者舉民間應役歲用丁四糧六總徵之易知而不繁猶綱之有綱也一串鈴則課收分解法也自是民間輸納止收本色及折色銀

矣穆宗隆慶元年十月巡按御史董堯封奏查出蘇松常鎮四府投詭田一百九十九萬五千四百七十畝花分田三百三十一萬五千五百六十畝因條上便宜事一議丈量二定糧冊三均糧役四明優免五平均徭六裁供億七申法守八嚴責成戶部覆丈量均賦私兌恐煩擾難行優免雖有定例但吳中起科甚重若止論糧石似為不均宜視田畝之數為差其餘悉如議報可戶部又覆應天撫臣林潤奏復糧額議改折二事謂各省

糧額俱以夏稅秋糧馬草為正賦差徭編增為雜派唯是蘇松諸郡不分正雜而混徵之名曰平米其中如馬役料價義役原非戶部之加增如輕賁脚米戶口鹽鈔亦非額糧之正數雜派漸多常賦遂累誠有如潤所言者宜令逐項清查舊額所徵之數通行造冊送部以憑裁減至於兩京各衙門俸銀改折之議則當斟酌輕重事難盡從蓋南京水陸四道米穀饒裕便於改折若一概施之北地亦或未便請將南京各衙門官吏人等月

糧及嘉靖四十年以前積欠京儲盡行改折每石七錢  
在北者量折十分之二每石一兩米貴仍復本色從之  
四年巡撫保定朱大器條陳田賦五弊言祖宗時糧有  
定額當全徵也近年務為姑息遂謂完及八分者官得  
轉遷是即無災稔輒自蠲二分矣即二分之數而類計  
之一郡千計十郡萬計積而上之可知也弊一糧有定  
數當完解也近年創為截解之法官吏藉已完者以邀  
虛聲姦民視後納者以為得計所解者少所負者多兼

以糧長之侵欺吏胥之漁獵其弊不可勝窮弊二國家  
存留糧係宗藩所在則抵補祿米無宗藩則數多餘羨  
今之官府率以不急視之勾管無專官歲會無定法祇  
以為奸民之利而已弊三官必任事而後食祿軍必在  
伍而後支餉此定制也今官有遷代軍有逃亡而俸廩  
未聞扣減則必有侵冒者矣弊四屯田在邊鄙則多拋  
荒在腹裏則多欺隱地與糧俱失舊額久矣議者不察  
乃為兌支之說夫官為收支其權猶在上也若聽其私

兌則地之埋沒數之虛報者曷從稽考弊五以上五弊  
皆今日所當釐正者部覆詔如議六年南京河南道御  
史陳堂奏言國制十年大造黃冊凡戶口田賦事役新  
舊登耗之數無不備載所以重國本而存故實也今沿  
襲弊套取應虛文奸吏得以那移豪強因之影射其弊  
不可勝窮蓋有司徵錢錢編徭役者為一冊名曰白冊  
而此解後湖之黃冊又一冊也有司但以白冊為重其  
於黃冊唯付之里胥任其增減凡錢糧之完欠差役之

重輕戶口之消長名實相懸曾不得其彷彿即解至後湖而清查者以為不謬於舊冊斯已矣竊謂欲理圖籍必專責成必嚴綜覈夫書算豪猾類非守令之法所能制也頃蘇松常鎮添設督糧通政一員請賜之勅責令兼理黃冊事務凡人丁事產悉照白冊攢造其欺隱脫漏者如例問遣駁回者依限完報田至十萬畝以上者倣古限田之法量為裁抑如勢要阻撓有司阿縱聽撫按官叅奏庶冊籍清而賦役可均部覆詔如議然自嘉



靖以後國用不足屢行加派後乃行一條鞭法一條鞭  
法者總括一州縣之賦役量地計丁丁糧畢輸於官一  
歲之役官為僉募力差則計其工食之用量為增減銀  
差則計其交納之用加以增耗凡額辦派辦京庫歲需  
與存留供億諸用度以及土貢方物悉併為一條皆計  
畝徵銀折辦於官故謂之一條鞭立法頗為簡便其天  
下每年常貢按明初有土貢方物中葉以後悉計畝徵  
銀折辦於官其所貢者唯茶藥野味及南  
京起運雜南直隸宜興縣貢茶一百觔廬州府六安州  
物而已

貢茶三百觔廣德州貢茶七十五觔建平縣貢茶二十  
五觔浙江湖州府長興縣貢茶三十五觔紹興府嵊縣  
貢茶八觔會稽縣貢茶三十二觔溫州府永嘉縣貢茶  
一十觔樂清縣貢茶一十觔杭州府臨安縣貢茶二十  
觔富陽縣貢茶二十觔寧波府慈谿縣貢茶二百六十  
觔處州府麗水縣貢茶二十觔金華縣貢茶二十二觔  
衢州府龍遊等縣貢茶共二十觔台州府臨海等縣貢  
茶一十五觔嚴州府建德縣貢茶五觔淳安縣貢茶五

勛遂安縣貢茶三勛壽昌縣貢茶三勛桐廬縣貢茶二  
勛分水縣貢茶一勛江西南昌府貢茶七十五勛南康  
府貢茶二十五勛贛州府貢茶一十一勛袁州府貢茶  
一十八勛臨江府貢茶四十七勛九江府貢茶一百二  
十勛瑞州府貢茶三十勛建昌府貢茶二十三勛撫州  
府貢茶二十四勛吉安府貢茶一十八勛廣信府貢茶  
二十二勛饒州府貢茶二十七勛南安府南康縣貢茶  
一十勛湖廣武昌府貢茶六十勛岳州府湘陰縣貢茶

六十觔寶慶府邵陽縣貢茶二十觔武岡州貢茶二十  
四觔新化縣貢茶十八觔長沙府安化縣貢茶二十二  
觔寧鄉縣貢茶二十觔益陽縣貢茶二十觔福建建寧  
府建安縣貢茶一千三百五十四觔內探春二十一觔  
先春六百四十三觔次春二百六十二觔紫笋二百二  
十七觔薦新二百一觔崇安縣貢茶九百九十一觔內  
探春三十三觔先春三百八十觔次春一百五十觔薦  
新四百二十八觔又寧國府宣城縣貢木瓜三千三百

枚廣西思明府貢消毒藥五百三十四味四川成都府  
貢藥材七味又南京每年起運各物司禮監制帛一起  
筆料一起鮮梅四十扛或三十五扛枇杷四十扛或三  
十五扛楊梅四十扛或三十五扛尚膳監笋四十五扛  
鮓魚二起各四十四扛守備處鮮橄欖等五十五扛鮮  
茶十二扛木樨十二扛石榴柿子四十五扛甘橘甘蔗  
五十扛尚膳監天鵝等二十六扛醃菜臺等一百三十  
二罈筍一百一十罈乾鮓魚等物一百二十罈紫蘇糕

等物二百四十八罈木樨花煎等物一百五罈鵪鶉等  
物十五扛司苑局荸薺七十扛苗薑一百擔薑種芋頭  
等物八十扛十樣菓一百四十扛魚藕六十五扛內府  
供用庫香稻五十扛苗薑等物一百五十五扛十樣菓  
一百一十五扛御馬監苜蓿種四十扛又各直省辦貢  
野味一萬四千五百一十四隻活鹿二百六十七隻活  
天鷲三百二十隻雜皮二十四萬七百六十一張翎毛  
二千二百七十六萬六千五百五十根

欽定續通典卷九